محضر مباحثات الرئيس جمال عبد الناصر مع العقيد معمر القذافي قائد الثورة الليبية القاهرة – قصر القبة في ٣ أغسطس ١٩٧٠ (الجلسة الثانية)

# الحاضرون

## من الجانب الليبي:

# من الجانب المصرى:

العقيد معمر القذافي.. رئيس مجلس قيادة الثورة الليبية، الرائد مختار عبد الله القروى، النقيب محمد المقريف.. عضوا مجلس الثورة الليبي.

الرئيس جمال عبد الناصر، حسين الشافعى، على صبرى.. عضوا اللجنة التنفيذية العليا، الفريق أول محمد فوزى.. وزير الحربية.

## المحتويات

	الموضوع	الصفحة
-1	مناقشة بيان العراق المعادى لمصر وموقف الدول العربية المتقاعس، ورد عبد	
	الناصر	١
-۲	القذافي يكرر حرصه على الاستفادة من العراق في المعركة	٩
-٣	عبد الناصر يشرح للقذافي تصعيد العراق ضد مصر	١٤
- ٤	القذافي يناقش عبد الناصر حول نتائج قبول مبادرة روجرز	١٨
-0	عبد الناصر رده على تصعيد العراق	37, 77 — 87
-٦	محاولات اسرائيل للاتصال بعبد الناصر	77
-٧	كثافة هجوم اسرائيل على القوات المصرية في منطقة القناة	79
<b>-</b> A	عبد الناصر يحذر القذافي من محاولات الوقيعة بين مصر وليبيا	٣١

محضر مباحثات الرئيس جمال عبد الناصر مع العقيد معمر القذافي قائد الثورة الليبية القاهرة – قصر القبة في ٣ أغسطس ١٩٧٠ (الجلسة الثانية)

عبد الناصر: يااخونا مش نجيب على وفوزى؟

القذافي: آه.

عبد الناصر: يافهيم على وفوزى قل لهم: يجو.

فهيم: حاضر.

عبد الناصر: أصل دول ناس إحنا ماقلنالهمش تعالوا! (ضحك)

القذافى: البيان بتاع العراق: "إلا اذا أعادت الدول التى قبلت مبادرة السلام الأمريكية الهادفة الى ايجاد تأسيس جديد للشرق الأوسط، النظر في موقفها الحالى".. هذا البيان الخاص بالعراق..

عبد الناصر: آه.

القذافي: يعنى مش قرار مجلس الأمن.. مشروع روجرز.

عبد الناصر: هو أنا بدى أقول: هم العراق عاملين موضوع مش على قضية فلسطين ولا كذا؛ هو الموضوع الحقيقة فرصة بيستغلوها ضدنا ويحاولوا يهيجوا ضدنا! وأنا لا أأمن ليهم الحقيقة ولا أثق فيهم يعنى كل بتوع حزب البعث العراقي – وأنا قلت لهم هذا أدامك في طرابلس – ولن أثق فيهم أبدا؛ أنا ناس حضرتهم وعندى خبرة معاهم، وإنتو جربوهم وإنتم هتشوفوا يعنى الأيام هتوريكم.

وأنا جالى عماش وعندى فى البيت وقال لى: والله الكلام اللى احنا قلناه على مجلس الأمن اللى أخوك الرئيس بكر بيقول يعنى: إحنا بنعمله لأسباب داخلية ولكن نحن نؤيد موقفكم وكذا وكذا! عندى فى الصالون قبل ما نروح طرابلس وأنا سكت! وراح قابل رياض فى وزارة الخارجية وقعد معاه وقال له: إنه مستحيل بالعمل العسكرى استرداد الضفة الغربية وليس هناك من سبيل إلا السبيل السلمى!

أنا ما رضيت أقول هذا الكلام في مؤتمر طرابلس الحقيقة لسبب. لأنى أنا بعتبر أن الحل السلمي ده بعيد عننا بنسبة ٩٩٥٪، إحنا بنقول: إن احنا قربنا له بنسبة ٩٠٠٪. فهي العملية الحقيقة الغرض منها استقطاب مجموعات، ولكن الناس عارفة ما هو البعث وبالذات في العالم العربي. وهم بعتوا في بيروت وتصوروا إنهم في بيروت بالاتفاق مع جورج حبش وفي طرابلس، ونحن لم نأخذ اجراء مضاد والناس لوحدها يعني أخذت اجراء مضاد.

الحقيقة برضه أنا بدى أتكلم على إحنا لا نستطيع إن ايدينا تتكتف إحنا بنحارب وجزء من بلدنا محتل، السعودية مادفعتش القسط الأخير وبعتوا لنا.. طالما سوريا كاسرة وموقفه الخط مش هندفع! يعنى إحنا قاعدين زودنا ميزانيتنا وولادنا بتموت والقسط بتاعهم ١٠ مليون – هم بيدفعوا كل ثلاثة أشهر – وبعدين قالوا: ابعتوا لنا حسن عباس زكى قلنا: حاضر وبعتناه، سافر حسن عباس زكى الملك فيصل هايروح له حسن عباس زكى هايقول له: ياسوريا تعمل الخط يامقدرش أدفع، يعنى هذا هو الوضع في العالم العربي!

وبعدين طب وأنا الآخر الاتحاد السوفيتي صفقة السلاح اللي عاملينها بكام؟

ف. فوزی: ۷۰۰ ملیون دولار.

عبد الناصر: ٧٠٠ مليون دولار هندفع منها بالعملة الصعبة؛ الهليوكبتر والعربيات والجرارات والعملية اللي إنت ماضيتها بكام؟

ف. فوزی: ۱۰۰ ملیون.

عبد الناصر: على ٤ سنوات. هو أنا معتبر إن احنا عايزين ده؛ لأن اذا ماكانش ده هيتعمل واذا ماكانش جيش هيتعمل مافيش حل في الموضوع لا عسكرى ولا سياسي، ولا يمكن أن نصل الى حل سياسي حتى إلا كانت قوتنا تجبر أعدائنا على ذلك.

نمسك الدول العربية، كلها قاعدة ماحدش بيتكلم ماحدش بيدى تصريح، العالم ده كله لازم يعنى نأخذه أيضا معانا مانعزلش نفسنا واسرائيل تبقى معاهم. قبلنا قرار مجلس الأمن، ده كلام روجر بيقول: وقف اطلاق النار ٣ أشهر بين مصر واسرائيل لأن الباقى فيه وقف اطلاق النار! وبعدين يارنج بيعلن..

الاعلان الأول: اللي هو النقطة الأولى: الاقرار مش الاعتراف وده موجود في اتفاقية الهدنة هذا الكلام، الاقرار بأن كل الدول اللي في المنطقة لها الحق في الحياة والاستقلال.. الي آخر هذا الكلام؛ اللي هي اسرائيل والأردن ومصر.

النقطة الثانية: موافقة اسرائيل على الانسحاب من.. إحنا بنترجمها الأراضى العربية المحتلة لكن هم بيترجموها من الانجليزى من أراضى محتلة، ولكن وفقا لقرار مجلس الأمن ٢٤٢ بيقول في أوله: إنه يؤكد بأنه لا يقر احتلال أي أرض بالقوة؛ معنى هذا يبقى الانسحاب الكامل بعد كده مافيش حاجة.

آدى المقترحات بكل حذافيرها.. آدى مقترحات روجرز.

العملية ليس فيها شئ إلا إن احنا بنرجع تانى لسنة ٦٧ اللى هم مارضيوش ينفذوا فيه قرار مجلس الأمن واللى اسرائيل رفضت أن تقبل مبدأ الانسحاب، واللى شايفين الأسبوع ده كلهم بيقولوا: الأحزاب والوزارة والحكومة ازاى ننسحب من أراضينا! والوزير بتاع حزب جاحال بيقول: ان الانسحاب معناه ترك جزء من فلسطين!

إحنا الحقيقة بحثنا هذا الموضوع وقعدنا وقلنا يعنى بعد التهديدات اللى حصلت دى: ليس أمامنا إلا إن احنا نقبل؛ يعنى إحنا يوم ما نقول إحنا بنرفض الصبح اسرائيل بتاخد ١٢٠ طيارة فانتوم وسكاى هوك، والعالم كله بيقول: إن احنا عايزين حرب وهى الضحية! وقلنا: هنعمل انقسام فى داخل اسرائيل ونشوف الأمريكان هيعملوا ايه، وحصل فعلا ومكتوب فى الـ Time والـ News Week اللى فيها أسرائيل واللى فيها أمريكا الحقيقة بيقولوا: ليه ماكملناش وتشاورنا معاهم قبل كده؟!

الحقيقة مبدأ التشاور .. أنا في هذا لي فيه وجهتين نظر: إحنا معملناش حاجة جديدة لأن قرار مجلس الأمن، لكن دلوقتي أنا اذا تشاورت معاه وطلع وسجل خطتي وأنا لا أثق فيه

أو تسرب الموضوع – وأنا عامل الموضوع على إننى هاتكلم فيه يوم ٢٣ وهاشرحه ٢٤ وهانرد ٢٢ – اذا كان تسرب قبل أنا ماأتكلم كان ممكن يعمل لى رد فعل داخلى هنا، وأنا حريص على أوضاعى الداخلية.. لازم أفهم الناس ايه العملية لكن هم دول لو اصطادوا العملية..

النهارده الكلام اللى بيقولوه داخليا ليس له رد عندنا، لكن ما كنت أقدر أقول لحد إلا يوم ٢٢، وبعدين لما نتشاور إحنا هل أنا عايز أيضا ايدى تبقى حرة؟ ومش عايز أخلق علاقات بحيث أن أنا أتشاور وده يقول لى لا.. وده يقول لى بلاش وده يعمل ايه على أساس الشعارات والكلام ده، ونضيع الحقيقة مصالحنا في أمور بهذا الشكل!

نمسك سوريا مثلا، لا تستطيع أبدا إن وزير خارجيتها يدى تصريح.. لا يستطيع أبدا، إحنا بنقدر إحنا ادينا تصريحات وقلنا فى تصريحات: حق اسرائيل فى الحياة واسرائيل مش فاهم ايه وكلام من ده.. وآدى الوضع.

نيجى بقى للفدائيين للمنظمات الفدائية، بتعمل ايه المنظمات الفدائية؟ اللى بيضربوا بيسان بالصواريخ دول ناس من عندنا اللى موجودين مع فتح.. ناس من عند الفريق فوزى وضباط من عند الفريق فوزى اللى بيضربوا الصواريخ واللى دخلوا نسفوا خطوط الكهرباء موجودين.. النقيب مروان والمجموعة اللى معاه والأولاد بتوعنا اللى كانوا في غزة. هم مابقولش مابيشتغلوش هم بيشتغلوا وبيضربوا برضه، مافيش حرب فعلا مافيش مقاومة في الداخل إلا في قطاع غزة.. أظن ده موضوع واضح.

قطاع غزة إحنا متكفلين بيهم وبنبعت لهم والله كل شهر ٥٠ ألف جنيه، فوزى بيبعتها عملة صعبة عشان الناس اقتصاديا يقدروا يقفوا على رجليهم ولا يركعوش لليهود.

طب بعد كده بنقعد بنقول: لأ.. وبنحرر من النهر الى البحر! مين اللى هيحرر بقى من النهر الى البحر؟! اللى هو من نهر الأردن الى البحر المتوسط، وامتى؟ التقدير عسكريا أنا رأيى أما نقعد نقول هنحرر من النهر الى البحر بالطريقة اللى ماشية وبعملية التوازن اللى أمريكا بتقولها وبتقصد بيها تفوق اسرائيل؛ بنقعد كمان ١٠ - ٢٠ سنة على هذا الأساس بالشكل اللى احنا بيه النهارده؛ لأن ما حد بيعبا ولا حد بيعمل حاجة ولا حد ناوى يحارب ولا حد مستعد يقاتل، وكلهم ملتزمين بوقف اطلاق النار وفيه هدنة بينهم جميعا وبين اسرائيل!

اذا كان الوضع بهذا الشكل، سينا هنا متهمنيش اليهود هنا ميقدروش يهودوا سينا لأنهم هيهودوا الطوب هيهودوا الرمل مش ممكن! لكن اللي ماشي في الضفة الغربية النهارده

بيبنوا فى الخليل وبيبنوا فى بيت لحم وبيبنوا فى نابلس وبيبنوا فى القدس وبيبنوا فى حتت وهيهودوا المناطق دى كلها! والكلام بتاع الجرايد الاسرائيلية والمعلومات موجود.

طب اذاً إحنا الحقيقة ياهنحرر الضفة الغربية يااليهود هياخدوها ويصفوها، يانحرر غزة يااليهود بياخدوهم ويصفوهم، دلوقتى بيهجروا من غزة الى الداخل.. ده الكلام اللى كنتوا هتتكلموا فيه بكره.

هذا الكلام لما كنا في طرابلس وقلنا: تحرير فلسطين، هذا الكلام مش أول مرة بنقعد في محافل كده ويحصل كلام.. بس طب هاقبضه أنا منين الكلام ده؟! إنتو لسه ماقعدتوش وأنا عارف هنقعدوا هنتقفوا واللي هنتفقوا عليه هيتنفذ والا مايتنفذش ماعرفش! بتجربتي أنا مافيش حاجة هنتنفذ، يعنى الحقيقة أنا ماشي معاكم لأن أنا ماشي في السكة دي؛ أما ده هيقول: ازالة آثار العدوان مابيشتركش.. قالوا كده، لأ.. هدف جديد نشترك.. طب هدف جديد آهو تعالوا اشتركوا ماحدش هيشترك ياأخ معمر!

صبرى: قالوا: ياترفض قرار مجلس الأمن يامش هنشترك برضه، ياإما قرار جديد وإلا منشتركش، وأما جه قرار جديد يقول لك: ياترفض قرار مجلس الأمن وترجع.. وفي النهاية مايشتركش! الموضوع هو الهروب من المعركة.

عبد الناصر: لأ.. إحنا عايزينهم في المعركة الحقيقة إحنا عايزينهم ييجوا في المعركة، ولكن أنا مش هاجيبهم غصب عنهم، يعنى أنا بعرف البعثيين بالذات بعث العراق ميشيل عفلق والجماعة دول بيقولوا كلام لا أثق فيهم.

بعد كده طيب إحنا أخذنا هذه الخطوة وهيجى يارنج وهيحصل وقف اطلاق النار ٣ أشهر، الحقيقة إحنا عايزين وقف اطلاق النار لـ ٣ أشهر ده بينفعنا؛ لأن حتى قواعد الصواريخ مش عارفين نبينها وصواريخنا موجودة في العراء في أكياس رمل مقدرناش نعمل أسمنت من الضرب اليومى. وبعدين هم بيقولوا ازاى هدنة؟ طيب ما أنتم عندكم هدنة يعنى أنا كفرت عشان لغيت الهدنة السنة اللي فاتت، أنا اللي كفرت علشان لغيت وقف اطلاق النار؟! كان ممكن برضه أستعبط زيهم وأفضل ساكت وآهو وقف اطلاق النار ماشي ولا أضرب طلقة ولا حد يضربني طلقة، ولكن إحنا بنقول: استنزاف وإحنا مستعدين ١٠ مصريين قصاد ١

یهودی.. ده الکلام اللی احنا قایلینه یموتوا ۱ یموت ۱۰ من عندنا وراضیین.. وبهذا نکون بنستنزف اسرائیل.

وبعد كده هيحصل وقف اطلاق النار وبعدين يارنج هايجي، ويارنج ماهو قعد يتكلم معانا ١٨ شهر إحنا واسرائيل والكلام ده بدون نتيجة، طب ايه اللي يضمن إن العملية الجاية فيه نتيجة؟! يعنى العملية الجاية أنا ما عندى ثقة إنها هتنجح أبدا، لكن لو كنت أرفض كان يبقى وضع اسرائيل يتعزز.

ولكن أنا برضه بدى أقول: أنا لازلت - وأنا قلت لكم فى بنغازى - أنا عايز حل سلمى أنا اللى بحارب أنا اللى عايز سلمى؛ لأن أنا عارف ايه الحرب وياريت ناخد حل سلمى ياريت ناخد حل سياسى.. العملية صعبة جدا مش عملية سهلة.

العراق مش عايزة حل سلمى عايزة حل عسكرى؛ اتفضلوا يحاربوا.. مستعد يحاربوا وأديهم أنا ٥٠ مليون جنيه سنويا، اذا كانوا هم هيحاربوا ويحرروا الضفة الغربية هساعدهم أنا به مايون جنيه من ميزانية قواتنا المسلحة أو أكثر حتى بس يحرروا الضفة الغربية ويحاربوا!

فى سوريا، موقفهم برضه يعنى الأتاسى برضه فى طرابلس قال لى: يقدر الموقف، ولكن هم أما لقوا بعث العراق عمل كده هم ماأخدوش موقف ضدنا زى العراق، ولكن برضه طلعوا بيان أول امبارح من القيادة القطرية والقيادة القومية ضد قرار مجلس الأمن وضد مبادرة روجرز وده كذا وكذا.. هم أحرار يعنى.

بنيجى هذا الأردن، الحقيقة الأردن ناس هذا الملك حسين فى هذا غلبان، كيف يسترد الملك حسين الضفة الغربية والقدس؟ يعنى أنا قلت له فى اجتماع: روح إعمل أى حاجة مع جونسون عشان الضفة الغربية، اذا قعدت فترة طويلة بهذا الشكل اليهود لا يمكن يرجعوها ومشاريعهم كلها ومشروع آلون وكل الكلام ده على أخذ الضفة الغربية. مع هذا – وهو يعرف – أنا جمعت قادة الجيش وقعدت معاهم وقلت لهم قبل ما أعلن هذا الكلام إن مافيش حل سلمى.

الحقيقة كون بقى بيجى حد ويكتفنا ويقول لنا: لأ.. إقعدوا كده وافضلوا قاعدين لغاية لما نحرر من النهر الى البحر؛ إحنا غير مستعدين الحقيقة لهذا لأن هذا الموضوع معناه فرض وصايا علينا من أى دولة عربية، وإحنا الدولة اللى بنعانى إحنا دولة اللى جزء من أراضيها محتل، شعبنا قبل ده ٣ سنين.. الى متى سيقبل هذا؟! وبعدين إحنا الدولة اللى عندنا كل أسبوع خسائر قتلى وجرحى.

بعدين الفلسطينيين بيقولوا: ماحدش يتكلم باسمهم لا زعيم عربى ولا أى دولة عربية وإنهم لا يقبلوا الوصايا وكذا.. طيب إنتو لا تقبلوا وصايا؟ آه.. إحنا عمرنا ما قلنا وصايا بس إحنا كمان مايحكمناش نايف حواتمة! فتح بيقولوا: إنهم متفهمين لكن جورج حبش ونايف حواتمة بيزايدوا عليهم.. اذاً هيطلع في الآخر نايف حواتمة هيحكم مصر! ماينفعش هذا الكلام أبدا!

ده الموقف.

بالنسبة للجزائر، برضه الحقيقة إنت عارف رأيى إحنا لا نثق فى بوتفليقه، أنا بعتبره بيشتغل لمين؟ ماعرفش الله أعلم! وهم ماشيين – وأنا حكيت لكم التفاصيل – مع المغرب العربى وفيه خطة كبيرة بين تونس والعراق والجزائر والمغرب، وهم أساؤوا الينا كثيرا جدا رغم ما عملناه معاهم أيام ثورتهم، ولكن هذا شئ وهذا شئ آخر!

النتيجة إن احنا الوحيدين اللي بنحارب النهارده والباقيين كلهم بيتكلموا الحقيقة، إحنا الوحيدين اللي بنخسر، إحنا الوحيدين اللي بندفع.. الي متى الحقيقة شعبنا بيحتمل هذا؟!

وبعدين الفلسطينيين عايزين يحكمونا ويمشونا زى ما هم عايزين! بيقولوا: تصفية القضية الفلسطينية؛ أنا مستعد أحل أنا قضية سينا وأسيب القضية الفلسطينية للفلسطينيين زى ما بومدين بيقول.. مش بومدين بيقول! والحدود اللى بينى وبينهم حدود معروفة والحدود قديمة وموجودة من أيام الانتداب ما فى حدود جديدة.

وهذا الكلام عرض علينا في ٦٧، أنا قلت في خطبي وقلت للاخوان: أنا متهمنيش سينا اللي يهمني القنال؛ لأن القنال بتجيب ١٣٠ مليون جنيه في السنة. الحقيقة بناخد جزء منها دلوقتي من الدعم لكن الباقي عندنا خسارة، وآبار البترول بتجيب ٣٠ مليون جنيه يعني ١٦٠ مليون جنيه، وفيه مناجم الفحم والمنجنيز.. الي آخر الكلام ده. كل ده مايهمش، وفيه طبعا معامل التكرير بتاعة السويس ومصنع السماد وكل المناطق الصناعية دي دمرت.. معلش، وفيه نصف مليون مهجرين من منطقة القنال الي الداخل.. كل ده بنقوم بأعبائه الحقيقة والباقيين مابيعملوش!

طب ماذا يعمل ياسر عرفات والمنظمات الفلسطينية؟ هل فيه كفاح مسلح فعلا في الداخل؟ مافيه كفاح مسلح، إحنا بننشر بياناتهم اللي بنعرف أن ٩٠٪ منها كذب. بيانات الكفاح المسلح؛ عشان إحنا بنعتبر إن المقاومة ظاهرة صحية ووجودها بيفيدنا الحقيقة حتى سياسيا بيفيدنا.

رفض بقى قرار مجلس الأمن زى ما هو طالع النهارده ورفض مبادرة روجرز، ماذا ينتج عنه الحقيقة؟ حتى النهارده لو تراجعنا بعد اسرائيل ما قبلت يبقى موقفنا ايه عالميا قصاد الاتحاد السوفيتي وقصاد أمريكا وقصاد فرنسا وقصاد كل الدنيا؟! عملية مستحيلة خالص!

وبعدين هل هم متصورين إنهم في هذا بيزنقونا؟ متصورين إن احنا هنقدر نفسر وجهة نظرنا للرأى العام؟ قد يكون هيحصل انقسام في الرأى العام لكن هيبان، هل نسيب الضفة لليهود وعزة حتى نستطيع أن نحرر الكل؟ أو اذا كان فيه امكانية لتحرير الضفة الغربية وغزة بنحررها وسينا.

وبعدين بالنسبة للعراق، بقى يعنى العراق مااتكلموش معانا ولا حاجة، وراحوا تانى يوم عاملين البيان ومطلعين مظاهرة، وبعتوا لكل البلاد العربية تحريض.. الهيئات والعمال والطلاب وكذا، وطلعوا مظاهرة!

هو بقى فيه موقفين دلوقتى.. موقف العراق وموقفنا، كيف يمكن أن نلتقى؟! أنا بعتبر إن الأخ معمر حط نفسه فى مأزق بالعملية دى؛ لأن احنا لن نتراجع عن الموقف اللى احنا فيه، وإحنا أخدنا هذا الموقف على أساس من الاقتتاع الكامل، ونوقش فى اللجنة التنفيذية العليا ثم نوقش فى مجلس الوزراء ثم نوقش فى اللجنة المركزية، ثم عرض على المؤتمر القومى ثم نوقش فى المؤتمر القومى فى جلسة علنية وفى جلسة سرية، ثم قبل كده كمان عرض على جميع قيادات القوات المسلحة ونوقش فى قيادات القوات المسلحة، والواحد لم يتكلم يوم ٢٣ إلا وهو شايف إنه مغطى كل العمليات.

الحقيقة هو الواحد في هذا عن قناعة زي ما بيقولوا: انهزامي ولا استسلامي ولا كذا! اذا كان انهزامي ولا استسلامي ما كنا قعدنا مافيش اطلاق نار، وليه كنا أطلقنا النار؟! حتى يقضى الله أمرا كان مفعولا وآدينا ماشيين!

يعنى الواحد أساسا لازم بيقتنع إن فيه مصلحة وطنية ومصلحة قومية وإلا ماكانش أبدا يحط نفسه، أنا عارف إن القرار صعب.. القرار مش سهل يعنى عربيا ممكن الصيد فيه في الماء العكر كثير جدا، ولكن الحقيقة العملية أساسا إن احنا كلنا نثق إن فيه مصلحة في أن نسير في هذا الموضوع.

هل هناك حل سلمى بقى؟ مانقدرش نقول فيه حل سلمى، يعنى أنا بقول: الحل السلمى بعيد جدا والحل السياسى بعيد جدا، ويجب أن نسير فى عملنا العسكرى من أجل استخدام القوة لأن الحل السياسى عسير جدا.

ده كلامنا بالنسبة للموضوع باختصار أخدنا إحنا نص ساعة إلا خمس دقائق! (ضحك)

القذافى: والله إحنا الليبيه يخلقن كثير ونتصدى للى حصل فى الجبهة اللى كانت أو الصف اللى كان متحد من أجل المعركة، بغض النظر عن التناقضات اللى موجودة وعدم الثقة اللى موجودة واضحة، لكن من أجل المعركة والعدو المشترك ممكن نشارك. من الأول العراق حضرت المؤتمر، كنا نتكلم فى الأشياء العسكرية ونبعد فى الاجتماع الكلام عن المشروع وغيره والسياسة، بنتكلم بأشياء عسكرية تقدير الموقف العسكرى والالتزامات والمطلوب منهم كذا وكذا، لكن مادام العراق رفضوا الحضور، الجزائر مش حاسبينها من الأول لأن عارف من الأول هم واخدين بدون نية ماعندهمش اخلاص. لكن لما جاء البيان بتاع العراق اليوم فى منتصف النهار إنهم يرفضوا حضور المؤتمر، فشوفنا إن الأوضاع تمر بسرعة فى الوقت اللى أنا اتصلت بالبكر وقال لى هو طبعا كان بالشكل هذا والله رئيس دولة يقول الكلام هذا.

عبد الناصر: قال ايه؟

القذافى: قال لى: كلفنا حردان يحضر المؤتمر وهنبعت ضباط الركن وهنبعت رئيس الأركان، قلت: كويس، وبعدين يطلع حردان مش مكلف ولا حاجة ويطلعوا البيان هذا بهذا الشكل! فشوفت حتى الاجتماع بدون العراق هو يشتغل من جانب نحن والعراق، يعنى الليبى بالذات يشتغل معاهم. العراق والله عنده ثقة فى البعثيين الناس دول اللى تآمروا على عبد الرحمن عارف والجماعة دول، وإن احنا والله عندنا فيهم ثقة إن احنا هنلتقى جميعا على صعيد الوحدة. ده شئ مستبعدينه فى الوقت الحاضر؛ لأن دى تفاعلات سياسية ونضال فى المستقبل يجوز الحزب هذا يطور نفسه أو يحصل ما يحصل.

عبد الناصر: بعتوا لنا هم واحد النهارده نمرة ٣ وصل عندنا من القيادة منفى.. صلاح العمر.

القذافي: الحديثي؟

عبد الناصر: لأ.. الحديثى ده اللى كان جاى يقابلنى أنا ما قابلته؛ هقابله هنضحك على بعض وهقابله ليه؟! جايب لى رسالة من البكر، أنا قلت: أنا ما فى داعى أقابله يبعت لى الرسالة وأنا أرد عليها أو.. هو مطلع مظاهرات والاذاعة بتتكلم.

القذافي: غير الرسالة الأولى اللي جابها ولا هي؟

عبد الناصر: هي.. هي هو جه بيها امبارح، لكن هم فيه تاني واحد نفينه النهارده اللي هو صلاح العمر!

القذافي: صلاح اللي كان وزير اعلام.

عبد الناصر: اللي كان وزير الاعلام، آهو وصل عندنا منفي النهارده نمرة ٣ من القيادة! الـ ٣ لغاية دلوقتي وصلوا عندنا، المهم إنهم بيطلبوا يقولوا لهم تروحوا فين؟ يقولوا لهم: نروح القاهرة! (ضحك)

أصوات: (ضحك)

ف. فوزى: والضباط اللي جم..

عبد الناصر: جم ضباط هنا؟

ف. فوزى: آه.. طيارة مصرية وصلت لبغداد..

عبد الناصر: كم ضابط؟

ف. فوزى: ٤ منهم نائب رئيس الأركان.

عبد الناصر: منفى؟

ف. فوزى: آه.. وبعدين الطيار قال لنا في الجو..

القذافي: رئيس الأركان؟

ف. فوزى: نائب.

القذافي: اسمه ايه؟

ف. فوزى: مش متذكر.

القذافى: يعنى من حرصنا على إن احنا نستفيد من العراق فى المعركة، الحقيقة هذا اللقاء مع العراق والتلاقى هو لقاء مرحلى فى نظرى من أجل المعركة، خاصة إن هم ناس بيدعو الى المعركة والتحرير. هم طبعا معروف القصد من هذه الدعاية ومحاولة تزعم المنطقة، لكن إحنا بنكسبوهم من جانب آخر إن احنا بناخد قوتهم ندخلها فى المعركة. يعنى أنا كنت فاكر إن ممكن العراق يقدم ٥٠ – ١٠٠ طائرة يعنى ممكن خلاص اللى طالبينه منها، خلاص مش عايزين تحرير وهندمر اسرائيل، وتعرضوا لكلام من هذا القبيل وعليكم ١٠٠ طائرة وعليكم فرق. هذا الشئ مهم جدا فى المعركة، وفعلا الجبهة الشرقية اذا نجحت يعنى أعتقد إنه شئ ايجابى..

عبد الناصر: طبعا.

القذافي: سوريا موقفها هي بتدافع عن دمشق، يعنى واضح بعد ما شوفت الجبهة والخنادق والحاجات دي كلها، إن السيارات وجهتها ناحية دمشق الشرق يعنى الصواريخ في الخلف..

عبد الناصر: (ضحك)

القذافى: والله يعنى حالة دفاعية بحتة، وبيقولون: لو حاول اليهود التقدم بكيلومتر بيستغرق كذا ساعة والعملية هى دفاع عن دمشق. لكن هذا موقف دفاعى فى جهة تانية، أما الجبهة الواجهة الطويلة اللى فيها الأردن هذا الحقيقة فراغ ولابد من العراق، ويجوز إحنا بنعمل لواء والجزائر لو كنا فاكرين زى قبل تعمل لواء والسودان تاخد لواء، ليش يقولوا كويس؟ آه.. إحنا جبنا قوات بدل ما هم هيلحوا هذا اللى كان موجود وهيلحوا إن قوات مصرية تتقل الى الجنوب، إحنا بنقول: المهم إن توجد قوات فى الجبهة، بلاش قوات مصرية إحنا بنجيب قوات وخلاص علشان ما بندعم الجبهة المصرية وندعم الجبهة الشرقية.

عبد الناصر: بياخدوا اللواء الجزائري اللي عندنا هنا.

القذافى: ممكن كنا قبل كده عايزين إن احنا نشترك الآخرين فى الجبهة هذه، ونعوض عن طلبهم الملح دايما.. عايزين قوات مصرية، ويجوز مصر تبعت قوات..

عبد الناصر: عندنا لواء هنا في الجبهة أو بيرجع ورا على حسب.. مش كده؟

ف. فوزى: أيوه يافندم كل ٦ أشهر بيجيبوا واحد المقصود بيه التدريب!

عبد الناصر: كل ٦ أشهر بياخدوا اللواء ويبعتوا لنا لواء جديد.

القذافي: ما بيدرب يعني؟

عبد الناصر: يعنى هو مدرب لغاية لدوقتى في ٣ سنين ٦ لواءات! أيوه ياأخ معمر.

القذافى: فحرصنا هو على وجود العراق فى الجبهة لأنه مهم بالنسبة للمعركة، أما اذا خرجت العراق من الاجتماع ومن الجبهة العملية أصبح ميئوس منها.. الجبهة الشرقية. والعراقيين لما نتكلم عن جيش، لا نتكلم عن البعث ولا البكر ولا عن حردان أو عماش نتكلم عن أبناء العراق اللى هم ما أعتقد إن فيه حد من القوات اللى فى الجبهة ممكن يكونوا اللى هم خايفين من

المخاطرة؛ فهم عراقيين هم عرب وناس أشداء وأكفاء، والجنود العراقيين ما بيعرفوا حتى البعث.

هذا اللى كنا معتمدين عليه، لكن خروج العراق من الاجتماع ومن الجبهة خلق وضع جديد يلغى كل شئ، وبعدين جت فى وجوهنا إحنا أصبحت كثيفة، نحن تورطنا فى أشياء كان يمكن إن نبعدها لكن خلاص تورطنا فى خطوات وبعدين ضاع كل شئ بين ايدينا بسهولة كده!

والدوافع يعنى هم بيستغلوا هذه؛ يعنى الظاهرة الأخرى اللى أضيفت لهذا الشئ الخطير المادى، هو بالفعل بغض النظر عن المبررات كلها والأسباب اللى تجعل هذه المواقف شرعية والقبول وعدم القبول، لكن الشئ اللى حصل الآن هو فعلا فيه أزمة خطيرة فى المنطقة العربية أو فيه تصدع كبير، وفيه شئ ما كان يتوقع حصوله بعد ٦٧ بعد هذه الوحدة الكبيرة وحدة الصف العربي من أجل المعركة.

برضه زى ماسيادتك قلت وحدة الهدف مش وحدة الصف؛ وحدة الصف هو الضرورة لكن من أجل المعركة أجلنا قضية وحدة الهدف وقلنا وحدة الصف، يجوز الهدف هو المعركة، ماحدش يهاجم الرجعية تجمد الحركة الثورية والأشياء دى كلها. حتى ثورة ليبيا كانت غير منتظرة على اعتبار مرحلة صمود، وباقى الأمور زى ما هى والدعم زى ما هو؛ فليش إحنا ناتقى بالسعودية ناتقى بالتناقضات دى كلها إلا من أجل المعركة؟ اذاً ناتقى بالعراق وناتقى بالجزائر مثلا اللى هم فى نصف الطريق ما هم فى أقصى اليمين ولا هم معانا بالضبط فى الخط.

عبد الناصر: يعنى هو التصدع الموجود هو اللي افتعله العراقيين.

القذافى: افتعلوه وعايزين ينالوا إحنا عارفين إنهم عايزين ينالوا من الرئيس عبد الناصر وينالوا من الجمهورية العربية المتحدة، عايزين من هذه الأزمة اللى خلقوها يكسبوا من عطف الجماهير العربية لأن معروف إن الشعوب العربية بتأيد من يدعوا الى القتال والتحرير.. هم فيه كلام كده عايزين يعملوا شئ علشان يكسبوا عطف الناس فى هذا الظرف ويكسبوا شعبية. هم فى العراق والناس حكام العراق دول هم اللى عايزين القتال وان عبد الناصر عاوز الحلول السلمية

ويقال من موقف الرئيس عبد الناصر أو موقف مصر. هذا هو بالضبط الموقف اللي عاملينه العراقيين الآن، لكن هذا أثر فعلا يعني فيه ناس متحمسة وفيه ناس..

عبد الناصر: آه.. طبعا فيه معركة في الرأى العام فيه انقسام، تسمع لندن أو بتقرا لندن واخده موقف العراق العراق كلية والنهارده.

القذافى: حصلت مظاهرات بالفعل ضد مصر تقريبا فى الفدائيين اللى عملوا هذا، أنا قريت النشرة الخاصة..

عبد الناصر: لأ.. هي مش ضدنا يعنى ماحصلش ولا هتاف ضدنا، اللي اتعمل ده فيه فدائيين قالوا: لو حصل.. هيضربوها هيعملوها معركة مسلحة. طلعت المظاهرة مظاهرة صامتة بعد صلاة الجمعة ووصلوا لغاية الكفاح المسلح. المتظاهرين كانوا ٥ آلاف Reuters قالت: ١٠ آلاف لندن قالت: ٢٠ ألف وبعدين النشرة اللي بعديها قالت ٢٠ ألف وبعدين النشرة اللي بعديها قالت ٢٠ ألف! فده يعنى Reuters مبسوطة قالت ٢٠ ألف! فده يعنى عمقوا الهوة!

والحقيقة إحنا في التصعيد مع العراق ماصعدناش يعنى مشينا بسيط جدا، والحقيقة أصلا أنا عدم التصعيد أكثر مش علشان خاطر البعثيين أنا خايف على الناس هنا؛ الناس هنا معبئين أنا خايف يبقى فيه روح انفصالية موجودة ومانعرفش نصلحها لأن احنا سياستنا أساسا حسب الميثاق واللى ماشيين بيها.. عمود من أعمدة سياستنا القومية العربية والوحدة العربية، ولكن هم العراقيين بعتوا للنميري وبعتوا لك وبعتوا لسوريا وبعتوا لبومدين.

وبعدين مغالطين بيقولوا: إن المبادرة جت بعد مؤتمر طرابلس، كلنا نعرف إن المبادرة جت قبل مؤتمر طرابلس معروفة إنها يوم ٢٠ يونيو، وإن احنا في المؤتمر أولا: ماحصلش الكلام في الموضوع إن مافيش حلول سلمية، أولا بنتفق على الهدف ووسائل تنفيذ الهدف، والهدف حطيناه اللي هو تحرير الأرض العربية المحتلة، إحنا اللي متقدمين بالمشروع وممكن الكلام ده يفضل حبر على ورق الى متى نفضل مستنيين؟!

طيب إحنا النهارده كنا ماشيين في الطريق السلمي ده من الأول من ٦٧، والحل السياسي لم يمنع من إن احنا نعمل جيش من مافيش من صفر، عندنا ٢٥٠ ألف عسكري النهارده، ٧٥٠ ألف في ديسمبر ٥٥٣ مليون جنيه ميزانية. والنهارده وإحنا برضه بنشتغل كده لازم أيضا بنبني قواتنا المسلحة وبنمشي وهدفنا بتاع القوات المسلحة موجود والتوجيهات موجودة.

ولكن هم بيفتعلوا عملية سياسية ليكسبوا فيها ناس، وأنا بقول: إنهم هيخسروا يعنى يمكن معتبرين إنهم هيكسبوا، والناس أصلها كاشفاهم وعارفاهم وفهماهم وتعلم من هو البعث، وإحنا الحقيقة مستعدين في هذا بنوضح وهنبين. وبعدين النهارده أقرب الناس بتوع الضفة الغربية الفلسطينيين.. هل يتحرروا ولا بيفضلوا لغاية ما نحرر من البحر للنهر؟! يعنى هل اذا كانت فيه فرصة النهارده أحرر الضفة الغربية والقدس وغزة آخدها ولا ماآخدهاش؟! ده سؤال الواحد يسأل فيه نفسه قدام ربنا وقدام التاريخ، لأن اذا ماأخدتهاش ولا بعد ٢٠ سنة ممكن تيجي هذه الفرصة!

ممكن نتصور إن فيه حرب والحرب سهلة وندخل ونتلاحم ونعمل؛ لأ.. العملية مش بهذه السهولة العملية صعبة حدا، واللى هيباع فيها ماهياش سينا اللى هيباع فيها الضفة الغربية والقدس لأن اليهود طمعانين في الضفة الغربية والقدس وده كلامهم.

طبعا الانقسام ده الحقيقة برضه بيضعف العالم العربي إن الوحدة العربية هي عامل من عوامل قوة العالم العربي الحقيقة. ولهذا أنا بقول إن العملية اللي عملتها العراق حتى أضعفت موقف العرب قدام اليهود لأن احنا كنا مقدرين إن فيه انقسام في اليهود وهيحصل كذا وكذا وكذا، فلما اليهود؛ لقوا إن الانقسام هيحصل فينا قاعدين يتحايلوا على مناحم بيجين لغاية النهاره إنه مايستقيلش ويعملوا حل وسط ولسه ما جهزوش الرد.

وبعدين هل نسيب أمريكا تدى أسلحة لليهود؟! فالعملية الحقيقة زى ما تمام ما بتقولوا: العملية مفتعلة سياسيا لا حد بيقدر فيها المصلحة العربية ولا مصلحة كذا ولا كذا ولا كذا، زى اليهود ما بيقولوا: إحنا هندى انسحاب العرب هيدونا ايه؟ هيدونا كلام ما هم خدوا كلام سنة ٤٩!

وبعدين برضه بدى أقول نقطة: تحرير فلسطين كلها عملية لا هتحصل فى ٦ أشهر ولا فى سنتين ولا فى ثلاثة عملية صعبة جدا. إنتم بتدربوا لوائين أخدتم وقت قد

ایه فی عمل لوائین یاأخ معمر؟ هتعملوا لوائین تانیین هتخدوا وقت أد ایه تانی؟ مش معنی هذا إن احنا مش هنحارب.

القروى: إنتم بتحاربوا الآن.

عبد الناصر: وبعد كده أنا رأيي إن مافيش الحل السلمي مافيش، لكن اذا رفضنا الكلام ده يبقى الحقيقة أولا: بندى اسرائيل سلاح ثم بنرفض احتمال جلاء اليهود عن الضفة الغربية أو القدس وغزة وهذا الحقيقة مطلب.. مين هيحرر الضفة الغربية والقدس وغزة؟! إحنا مش عايزين نشاكل العراق لكن الحقيقة في مواجهة هذه المواضيع لابد لنا أن نواجه، مش أول مرة نواجه فيها إحنا ياأخ معمر. إنت يمكن بتحس بتعب نفسي وتستغرب أنا ازاى بتكلم في الموضوع بالبساطة دى؛ لأن بالنسبة لي دى المرة المليون اللي بدخل فيها مواضيع بهذا الشكل بتفرض علينا فرضا يعني.

القذافى: هو يعنى الشئ اللى حصل شئ خطير على أى حال حتى على الأمة العربية كلها، مش كل واحد بيقدر يفهم بالضبط حيثيات الموضوع والاشكاليات، بل الدهماء والناس العامة قد لا يفهمون موقف العربية المتحدة تماما.

عبد الناصر: التاني أسهل التاني بيرفع شعار.

القذافى: آه.. بيرفع شعار وبينادى بالحرب؛ ده ممكن الناس البسطاء..

عبد الناصر: أنا مابرفعش شعار أنا عارف ولهذا هو ماسك قوى فى العملية دى، هو حاسب الحساب اللى بتحسبه ده إنه هو بيقول لك: يسقط الحل السلمى الاستسلامى! الناس مش فاهمة ايه الحل السلمى ده، يسقط مشروع روجرز الناس مش عارفة ايه مشروع روجرز؛ ولذلك إحنا جهدنا أصعب من جهدهم فى هذه العملية.

القذافي: وهذا شئ خطير الواحد يعتقد إن احنا نقدره بالضبط.

عبد الناصر: ما العمل؟

القذافى: هو ده اللى احنا جينا علشان نبحثه، ما هو المخرج لهذه العملية؟ الآن بيقولوا: إنتم اللى بديتم إنتم اللى قبلتم واتفقنا على الحرب والتحرير، وبعدين بعد ما جيتوا ولا شاورتونا وقبلتوا..

عبد الناصر: هل إحنا اتفقنا على نبذ قرار مجلس الأمن في طرابلس؟!

القذافى: لا مطلقا، هذا ما يختلف عن تطبيق قرار مجلس الأمن، ليش التقيتوا بعد قرار مجلس الأمن مع العربية المتحدة وليش اجتمعتموا فى طرابلس؟! قلنا له هذا كلام، قلنا: إنتم اذا كان هذا هو مبدأكم الفروض بعد قرار مجلس الأمن خلاص ماالتقيتوش.. العرب كلهم اللى قبلوا القرار وتقعدوا تجتمعوا علشان تطبقوه..

عبد الناصر: لا.. وجم هنا يعنى حضروا مؤتمرات دول المواجهة كلها، بس لم يحدث في طرابلس إنهم قالوا إن احنا.. هم قالوا: هدف ازالة آثار العدوان، إنت اللي قلت حتى هذا الكلام: هدف ازالة آثار العدوان وفي العدوان مش كفاية عايزين الهدف تحرير فلسطين. طيب إحنا كنا هدفنا ازالة آثار العدوان وفي نفس الوقت ماشيين بالحل السياسي وقبول قرار مجلس الأمن، بنقبل هدف تحرير الأرض العربية المحتلة في نفس الوقت مانقدرش نرفض قرار مجلس الأمن، يوم ما نرفض قرار مجلس الأمن روسيا لن تعطينا قطعة سلاح! وأنا قلت لكم هذا الكلام، ليه؟ لأن روسيا في الأول لما ماقبلناش القرار منعت عننا السلاح، وبعدين روسيا كدولة كبرى اذا كان هدفنا تدمير اسرائيل مانقدرش تدينا سلاح لأن ده قدام العالم حتى كلام غير شرعي، ولكن اذا قبلنا قرار مجلس الأمن فهم هيدونا السلاح لنبني الجيش الدفاعي، ثم يعطونا السلاح لنبني الجيش الهجومي. وده كلامهم معانا، وأنا قلت لكم هذا الكلام بالتفصيل.

والسوريين أما قبلنا قرار مجلس الأمن جالى زعين وقال لى: شعبيتك هتضيع فى العالم العربى! قلت له: والله آدى الموضوع وهل الموضوع هو شعبيتى؟! ليس الموضوع شعبيتى بتضيع، لكن هابنى الجيش وهقدر أحرر البلد مابيهمنى، ومشينا فى هذا الموضوع. فى كلام طرابلس ماجاش قرار مجلس الأمن ولا الحل السلمى ولا الحل السياسى أبدا، عندنا المحضر كامل بكل اللى اتقال.

القذافى: يعنى إحنا فى المجلس بيقول اخوانى: هل العربية المتحدة لما قبلت هذا المشروع هل لأهداف سياسية وإلا بتقبل بالفعل بقصد تطبيقه؟ وإحنا فعلا ما نعرف إن الجمهورية العربية.. لأنها هى مناورة وراها أهداف سياسية للخروج من وضع معين.

عبد الناصر: تعرف ياأخ معمر والله اذا كان فيه جلاء عن الضفة الغربية وغزة والقدس وسينا أنا بقبل، وإلا أبقى رجل مفرط.

القذافي: معاك.. هذا مقابله أشياء أخرى.. مقابله الاعتراف باسرائيل.

عبد الناصر: مش acknowledgement recognition، هذا الـacknowledgement موجود في اتفاقية الهدنة – أنا أبعت لك نسخة من اتفاقية الهدنة الصبح – هذا الكلام كله اللي موجود إحنا ماضبين عليه سنة ٤٩.

القذافي: مرور اسرائيل لقنال السويس!

عبد الناصر: وإنهاء حالة الحرب، طيب مرور اسرائيل في قنال السويس قصاد عودة اللاجئين.. أنا قلت هذا الكلام في سنة ٦٧ يعني أنا بكسب مكاسب.

القذافي: عودتهم الى أي مكان؟

عبد الناصر: الى بلادهم.

القذافي: عودتهم الى غزة والضفة الغربية؟

عبد الناصر: لأ.. لأ.. عودة اللاجئين..

القذافي: أو يعوضهم يبنوا لهم منازل في اليرموك..

عبد الناصر: لأ.. هي قرارات مجلس الأمن العودة أو التعويض حسب الاختيار، ودي مشكلة كبيرة جدا.

القذافى: هم عوضوهم، جابت أمريكا كام مليون دولار أعطت الفلسطينيين وحبوا يعيشوا فى نفس المكان.

عبد الناصر: طيب ما هو البديل ياأخ معمر؟ البديل عن هذا سيبقى اليهود فى الضفة الغربية والقدس وغزة وسيبقى مئات الألوف من العرب تحت الاحتلال الصهيونى حتى نحررهم.. مش كده؟ مين هيحرر؟ هتبحثوا إنتم بكره.

القذافى: وإحنا بنبحث إحنا بداية علشان كيف نحررها.. إن هنجمع كذا طائرة هنجمع كذا دبابة.

عبد الناصر: ماذا يمنع هذا الكلام؟!

القذافي: لأ.. ما هو هذا العمل الذي حصل الآن خلاص منع الوصول الي أي قبول..

عبد الناصر: العمل.. ما إحنا قابلين قرار مجلس الأمن ده من ٦٧.

القذافي: العراق علشان بتشجعوهم يتقدموا الجبهة ويتورطوا، هذه الشعارات اللي بيرفعوها عايزين يتورطوا فعلا في تطبيق.. ينادوا بالقتال.

عبد الناصر: ماشى بكر وصدام والحديثي إنت عارف مين اللي بيحكم العراق؟ مين؟

القذافي: والله عصابة ما أعرف مين بيحكم! (ضحك)

عبد الناصر: مين بيحكم؟ صدام اللي بيحكم العراق.. نمرة واحد صدام التكريتي نمرة ٢ السامرائي نمرة ٣ الحديثي اللي كان هنا ومشي النهارده.. ناس ما تعرفهمش! ما هو عماش والبغل التاني ده اللي كان عندكم دول أراجوزات يعني بيلبسوهم بدل وكاكي وبتاع ويقعد ده يتكلم كده وده يتكلم كده، لكن دول على الهامش دول مش هم اللي بيحكموا! (ضحك)

القذافى: إحنا عارفين هذه المشاكل وماعندناش فيهم ثقة، لكن إحنا كنا بنجرهم علشان ناخد منهم قوة ندخل بيها المعركة؛ يعنى زى ما تهادن السعودية..

عبد الناصر: وأخدنا القوة من السعودية، إنت فاكر إنك إنت يعنى بتضحك عليهم وهم مش فاهمين؟! هم فاهمين.

القذافى: لكن بيقولوا: جت منكم بيقولوا: إنتم اعترفتوا بمشروع روجرز اذا إنتم كنتم تتفقوا معانا على التحرير وتخلوه لغاية لما نمشى وتتفقوا على مشروع حل سلمى!

عبد الناصر: الله! الحل السلمي ده إحنا متفقين عليه من ٦٧.

القذافي: لكن ليش المشروع الجديد المفروض اللي اتفقنا عليه إن احنا ٧ دول متفقة على التحرير؟

عبد الناصر: امتى التحرير ده بقى أقبضه من أنهى بنك؟!

القذافي: ما هو مقدر الموقف موجودة القوات موجودة.

عبد الناصر: فين هي؟

القذافي: لأ.. القوة العربية الموجودة الآن تكفي لتبيد اسرائيل..

عبد الناصر: خلاص يالا حرروا بكره!

القذافي: الفريق فوزى بيقول: القوة اللي موجودة في الجبهة الشرقية أكثر من قوة اسرائيل.

عبد الناصر: هذا الكلام على الورق ياأخ معمر.

القذافي: إحنا عايزين نحوله على الطبيعة.

عبد الناصر: ما تحولوه! أدينا هنتكلم سنة هنأخر الكلام سنة نأخر الكلام سنة ونص نقعد نتكلم مع يارنج سنة ونص؛ وورونا ايه اللي هتعملوه من أجل التحرير!

القذافي: إحنا بدنا الخروج من هذا..

عبد الناصر: ده أنا والله أعلنها بكره مصر جمهورية مصر ولا أخليش العراق يتحكم فينا!

القذافي: هو مابيتحكمش العراق..

عبد الناصر: ليه؟ لأن دى ناس لا أثق فيها وأنا قلت لهم قدامك: إن أنا لا أثق فيهم، ولا يمكن أثق فيهم - ولا أثق في ذمتهم.

القذافى: هذا واضح اذا كان بكر نفسه بيتكلم عليه بيقول: جايين بيكلفنا بحاجة وبعدين بيحصل العكس!

عبد الناصر: إنتو بتثقوا فيهم أنا الحقيقة..

المقريف: إحنا الحقيقة قلنا له كلام كتير جدا والناس يمكن الأكثر ..

القذافي: قلنا له: فيه كلام بدون حرب وفيه حرب..

عبد الناصر: يعنى إحنا لما قعدنا فى بنغازى ياأخ معمر وجيتوا تتكلموا على الوحدة، أول حاجة أنا قلت لكم: أنا راجل مرن وإحنا مرنين وايدينا طليقة وبنتكلم وبنشتغل سياسة ولينا موقف دوليا، الحقيقة اذا كانت الوحدة هتكتف ايديا ما بقدر. سوريا رافضة قرار مجلس الأمن وقلت للأتاسى قدامك: أنا قابل قرار مجلس الأمن.. ده قلناه بعد ما مشيى البكر.

القذافي: علشان يتفقوا فينا...

المقريف: من ناحية المرونة والحركة..

عبد الناصر: لأن بالنسبة للحل السلمى أنا بدى أقولك حاجة: يعنى عملية الحل العسكرى بدى أقول لكم مع احترامى للفريق فوزى موضوع رهيب جدا أنا برضه عايزكوا تتصوروه؛ أمريكا ورا اسرائيل وفى هذا الجبهة الشرقية هو كان عنده أمل فيها من الأول، وجالى قال لى: إن كون الجيش المصرى على أساس اسرائيل هتنقسم قسمين فى 77، قلت له: أنا لا أثق فى إن ممكن يبقى فيه جبهة شرقية.. هنلاقى نفسنا فى وقت الزنقة وحدنا، لازم نعمل الجيش بتاعنا على أساس إن احنا نحارب وحدنا، قال لى: ده يبقى مكلف، قلت له لأ.

وبعدين جالى هو بعد كده وقال لى: مافيش فايدة كلامك طلع صح، قلت له: يافوزى لا نفقد الأمل يجب أن نسعى وتروح بغداد ونحاول وكذا. حصل الانقلاب وجم البعثيين والبعثيين بقى يعنى اذا قال لك يمين يبقى هو عايز يروح شمال، واذا قال لك الله أكبر يبقى كافر! أنا تعاملت معاهم. موجود هنا صلاح البيطار أجيبه لك بكرة يحكى لك عليهم، هو قاعد يحكى هنا بيقول ايه البعث؟ البعث بيقول: أنا أضرب البعث؛ واقفين في العراق بيقولوا: عبد الناصر لا يريد أن يحارب اسرائيل.. اذاً فنحن لن نحارب اسرائيل بل سنحارب عبد الناصر! (ضحك). ده البعثين هنا بيقولوا على بعض قاعدين يفضحوا في بعض هنا.

ولا الجزائريين لا يحاربوا أبدا الجزائريين بيقولوا لك: إن قضية فلسطين دى الفلسطينيين بيحلوها، وبيحاربونا إحنا برضه الحقيقة وجرايدهم عمالة تنغز!

الحل السلمى قابلينه من ٦٧ وماشيين فيه، طيب افرض مافيش حل سلمى ما العمل؟

القذافي: الحل العسكري.

عبد الناصر: طيب ما إحنا بنقول ده من ٦٧.

صبرى: مالحنا بنستعد له.

عبد الناصر: طيب دلوقتى إنت هتروح بغداد مش هيوافقوك العراقيين، دلوقتى إنت هتروح بغداد والحقيقة أنا هتكلم بصراحة في الموضوع.. يعنى أنا متهيألى إنك بتجرى وراء أوهام إنك بتدفع العراق الى إنها ترمى بثقلها في المعركة، العراق لن ترمى بثقلها في المعركة إلا اذا أجبرت شعبيا على هذا، وإنت فاهم إنك تقدر تجرجرهم هم فاهمين نواياك في هذا وهيستغلوك لأهدافهم الخاصة. بكره هتروح بغداد وهنقعد تتناقش مع أحمد حسن البكر ومعاهم، أنا نشرت النهارده الجواب اللي أنا بعته لأحمد حسن البكر جواب عنيف جدا ومدخلنا في معركة عنيفة. ولأن هذه معركة لازم واحد فينا يعزل التاني ياأنا هعزله ياهو هيعزلني، هكلمك بصراحة.. هتروح بكره ما هي النتيجة؟ هيتقال: إن جا لنا معمر القذافي ورجانا وطلب مننا إن احنا نحضر، وإحنا قلنا: إن احنا مانقعدش مع أصحاب الحلول التصفوية الاستسلامية! هتبص تلاقي نفسك راجع الحقيقة واديتهم قيمة ومانفذتش هدفك. الحقيقة الموضوع عايز تفكير، وإذا كنت فاهم إنك بتضحك عليهم وهتجرجرهم هم ناس ناصحين وليهم أهدافهم.. ده هم شغلتهم إنهم يضحكوا على الناس!

القذافى: والله نفس الكلام هذا خطر عليهم وعارف إنهم بيستغلونا، لكن إحنا بنقول الاعتبارات هذه فى سبيل إن احنا نتغلب على الأزمة دى وندخل قوة عربية فى المعركة، مابيهمش الواحد مابينظرش لاعتبارات..

عبد الناصر: هل فيه احتمال للتغلب على الأزمة تعتقد؟

القذافي: والله أنا شايف إن الأمل ضعيف جدا الحقيقة، لأن الموقف..

عبد الناصر: يعنى الحقيقة المعركة أصلها هم دخلوها عنيفة وإحنا هندخلها معاهم عنيفة، وإحنا وضعنا صعب لأن احنا ما بنطرح شعارات، هو وضعه سهل إنه هيقول: تسقط الحلول السلمية التصفوية الاستسلامية! أنا هاقول: ياناس ده موضوع كذا وكذا، مهمتى أشق من مهمته لكن أنا معتبر إن أنا هكسب منه العملية دى، وماهياش أول عملية بالنسبة لينا.

القذافي: أولا الموضوع بدت في مهاجمة بعض...

عبد الناصر: طيب ما هذا البيان بتاع الصبح الحقيقة هو بعت لنا الجواب وقايل فيه: مؤتمر طرابلس وكذا، أنا ما تصورت إنه ينشر الكلام ده، هو ناشر الصبح إن احنا اتفقنا في مؤتمر طرابلس على تحرير فلسطين وعلى وعلى وعلى!

القذافي: آه..

عبد الناصر: وعلى هذا الأساس هو دلوقتى حطنى قدام العالم كله والرأى العام العربى إن أنا فى مؤتمر طرابلس قبلت التنازل عن العمل السياسى والحل السياسى! فإحنا بعد الظهر قلنا: نعمل ايه؟ أنا بعت له رد على جوابه راح له، فقلنا: الحل بما إنه نشر هذا الكلام – هو تقريبا الجواب بتاعه اللى هو بعته لك واللى بعته لى واللى بعته للنميرى – فننشر الرد.. الرد الحقيقة كاشف موقفه. إحنا نشرنا الرد وطلع فى وكالة أنباء الشرق الأوسط، يعنى الصبح فى الجرائد حتى فى ليبيا هيكون الصبح ودلوقتى عندهم.

فالعملية تصعبت لأن هو النهارده برضه عايز يحيى الموضوع تانى، والحقيقة أنا قلت لك: إن الظرف غير مناسب، لما كلمتنى فى التليفون للاجتماع لأن أنا عارفهم، وأنا لما فوزى جا لى قال لى: إنه وافق معاك على التليفون على الاجتماع، وأنا قلت له: إنت مارجعتليش ليه؟ ففوزى قال لى: إن أنا اتكلمت معاك يوم ٢٣ وإنت قلت لى شوف الأخ معمر

الأخ معمر هو اللي يقرر. الحقيقة كان يوم ٢٣ كان الموقف شكل ويوم ما فوزى اتكلم الموقف كان اختلف كلية لأن حصل موقف تانى. لذلك لما إنت كلمتنى في التليفون أنا قلت: إن من الأفضل دلوقتى نأجل شوية المؤتمر لغاية الدنيا لما تهدى.

النهارده آخر طوبة رماها قال: إن الجزائر موافقة عليه وليبيا موافقة عليه وخلاص الموضوع خلص. أما الموضوع هيخلص هيعملوا ايه بعد كده؟ فهو عايز يطلع الموضوع تانى فطلع البيان ده النهارده إن مش هيروح كذا إلا اذا الدول المعنية – ماجابش إسمنا، معروف إن احنا يعنى – سحبنا الموافقة، طبعا هو يعلم إن احنا لن نسحب الموافقة يعنى وهو عارف هذا.

فعايز يحيى الموضوع تانى، وبعدين يبقى أحياه النهارده فعلا، وبعدين إنتو هتروحوا له بكره هتحيوا الموضوع كمان يومين ثلاثة.. هل هيحضر المؤتمر ولا لأ؟ هيأجلوا المؤتمر شهر ايه المانع يعنى؟ إحنا بقالنا ٣ سنين ما نقعد ٣ سنين وشهر!

القذافي: الموقف هيتدهور أكثر.

ف. فوزى: فى التخطيط العسكرى يقصد دخول وحدة عراقية ولو وحدة صغيرة على خط وقف اطلاق النار، وهذا لم يتم من جانب العراق.

القذافي: إحنا كنا عايزين نمشى حسب الواقع مانعملش افتراضات.

ف. فوزى: حرادن التكريتي منذ سنة أول ما جه وزير الدفاع ونيته قايلها لى مش عايز يبينها علانية: أنا أجيب طائرة وأحطها في الأردن وماأعملهاش دشمة.. فعمل ٤ دشم السرب ١٦ طيارة، جندى عراقي يدخل على خط وقف اطلاق النار.. ماحصلش!

عبد الناصر: يعنى هذا ليس كلام عن الجيش لأن الجيش هنا بيمشيه السياسيين.

القذافي: بعدين مش من صالحنا هذا الموضوع.

عبد الناصر: بدى أقول لك ياأخ معمر: إحنا لم نبدأ معاهم في هذا الموضوع الحقيقة.

القذافي: يعنى لو سكتم إنتم عنهم ايش يحصل عندهم هيستمروا في الشتيمة؟

عبد الناصر: أنا.. مابشتمش أنا مااشتمتش أبدا.

القذافي: يعنى واضح حتى أنا قريت كلام موسى صبرى.

عبد الناصر: موسى صبرى قال ايه؟ والله أنا ما قريت كلام موسى صبرى.

القذافي: قال: الذين يدورون حول أنفسهم وارتفاع أصواتهم.. وارتفاع الصوت.

عبد الناصر: لأ.. ده أنا قابل النهارده أكثر من ده ميت مرة ردى لبكر.. اذا كان على الكلام ده أنا قابل قده ألف مرة، لأ.. لأ.. أنا بتكلم بصراحة، أنا بقول له: أنا بتساءل لماذا لا تطلقون النار على اسرائيل ولماذا لا تطلق اسرائيل النار عليكم؟! لماذا لا تغير طائراتكم على اسرائيل ولماذا لا تغير طائرات اسرائيل على مواقعكم؟! أريد أن أعرف السبب في هذا.. عايز أعرف ايه السبب يعنى؟! إلا اذا كان فيه طرف ثالث، لأن أنا اتصل بي اليهود ١٢ مرة زي ما قالت جولدا مائير، قالت في البرلمان: إنها اتصلت بي ١٢ مرة وإن أنا رفضت أرد عليها. بعتوا لي فعلا آخر مرة من أسبوع باعتين مع بولك اللي أصله مستشار كندى أنا عارفه الراجل.. بعتين بيقولوا لي: إحنا مش عايزين حاجة منكم خالص، وإنتم مالكم ومال الضفة الغربية ومالكم ومال القدس وغزة بالنسبة لمصر؟! وسينا.. الكلام لينا يعني ما بنرد.

القذافى: اذاً خايفة اسرائيل من مصر معنى هذا إن احنا قوتنا..

عبد الناصر: الله.. بعتوا لى ١٢ مرة عن طريق تيتو وعن طريق رومانيا، بعتوا لى كذا مرة وعن طريق دول افريقية طالبين هيكل يقابل حد فى أوروبا - قبل ما يبقى وزير - سرا حتى يروح رومانيا. كان رأيى إن احنا عندنا قرار أن لا يحدث اتصال بينا وبين اسرائيل وإحنا نشكر، وكلامهم اليهود

وكلام جولدا مائير واشكول والكلام ده.. بس طيب إعملوا contact معانا وهتشوفوا إحنا ايه نوايانا.. ورفضنا. ووفقت أخيرا جولد مائير قالت: إنها اتصلت بمصر ١٢ مرة علشان تثبت للناس إنها عايزه سلام وإن مصر رفضت ترد عليها.

قطعا فيه اتصال بينهم وبين اسرائيل لأن هذا الوضع ليه إحنا بننضرب وليه العراق مابينضربش؟!

القذافي: بيقولوا: لأن الاستراتيجية غير واضحة قواتنا مافيش داعي نخليها تحتك بالعدو.

عبد الناصر: لأ.. أنا مش بقول ليه مابيضربش.. ليه اليهود ما بيضربهوش؟! (ضحك) تقول لى: الاستراتيجية غير واضحة! ده هو مابيضربش طيب لكن ليه اليهود مابيضربهوش هو؟! ما هم يعنى بيضربوا ساعات الأردنيين بيضربوا ساعات السوريين بيضربوا اللبانيين، ليه العراقيين مابينضربوش؟ ليه مافيش غارة جوية على القوات العراقية؟!

القذافى: معروف قالوا لنا فى الجبهة الشرقية قالوا: اذا ما إحنا بدينا اليهود ما يبدأوا.. هم كده العراقيين بيقولوا.

القروى: يعنى معنى هذا هم عندهم وقف اطلاق نار!

عبد الناصر: أكثر، أنا طالب أصل في جوابي لبكر إنهم يردوا على الأسئلة دى، حاطط له أسئلة يردوا على الناصر: عليها، واتذاع الجواب أدعناه ووزعنا الجواب على السفراء العصر ووزعناه على الصحافة المغرب لأن بنرد على البيان ده.. ازاى الحقيقة؟ لأن هو بيقول: إننا اتفقنا في طرابلس على كذا وكذا وبعدين شارحين المغالطات والكلام ده، الحقيقة هذه المعركة.. ما المعركة كانت موجودة في طرابلس ياأخ معمر هي جديدة اللي بينا وبين العراق؟!

القروى: في الجلسة؟

عبد الناصر: لأ.. من قبل الجلسة من أيام الأخ معمر ما كان في بغداد فيه معركة، والجواب..

القذافى: من المتناقضات اللى موجودة مسلمين بعدم الثقة فى هؤلاء الناس، هذا من الأول واضح وإحنا من قبل الثورة عارفين وإنت عارف، والضباط اللى معتقلينهم اثنين بعثيين من اللى احنا بنحاكم فيهم متآمرين، ومن قبل تنظيمنا إحنا أى واحد بعثى بنعزله، لكن رغم هذا الشئ اللى مسلمين بيه كنا عايزين نحن نستفيد من قوة عراقية زى ما استفدنا من فلوس ليبيا لما كانت رجعية أو فلوس السعودية الآن.. نستفيد من القوة العراقية بكل القوة كلها زى بعض.. هذا كان الغرض بهذا الشكل.

عبد الناصر: لأ.. أنا فاهم غرضك وهم فاهمينه برضه.. (ضحك) يعنى العراقيين فاهمين غرضك.

القذافى: حقيقى الأمور وصلت لهذه الدرجة الواحد كان ممكن حاصل كذا وحاصل كذا حتى نستطيع أن نخرج بسلام، لكن توها أصبح هذا فعل ماضى، كيف الواحد يستطيع يخرج من هذا؟ وهذا ما هو فى صالح العرب الحقيقة، ما يجرى الآن سواء كان بالاذاعات أو بالرسائل ما هو فى صالح مصر ولا العراق ولا فلسطين ولا أى واحد!

عبد الناصر: هو إحنا مضطرين الحقيقة لسبب.. لأن موجهة اذاعة الدعايات علينا يعنى ما تقوله بغداد. مصر لا تسمع بغداد، لكن لندن تنقل كلام بغداد كله طول النهار، ولندن دى محطة كلها سم يعنى! اذاً لازم إحنا نرد أولا علشان الناس عندنا جوه هنا. إحنا فى الأيام اللى فاتت دى كنا بنقول موقفنا كل يوم فى الأهرام، وإنتم كنتوا بتشوفوا مابنردش على حد ومابنقولش حاجة.

وبعدين بالنسبة للرأى العام العربى أيضا لازم يعرف إن العملية ماهياش عملية شعارات بس لأ.. فيه موضوع؛ وده هيعوز مننا جهد أكبر الحقيقة فى الايضاح والتفسير. يعنى إحنا اتصلنا بناس، ناس تتصل بناس لكن اعلاميا لازم الحقيقة نوضح الموضوع؛ خصوصا إن هم واخدين المبادأة وإحنا اللى بنرد. إحنا كنا نتمنى إن كانوا يتكلموا معانا أولا بدل ما يعملوا المظاهرة، لكن هم وجدوها فرصة ومتصورين إنهم هياخدوا بيها الجماهير العربية. مش هم أول ناس برضه عبد الكريم قاسم حاول والتانى حاول وهم كانوا موجودين. العملية ماهياش كده العملية فعلا هم هيموتوا طبعا عايزين ياخدوا دور قيادى، لكن صعب.

القذافي: هذا مستحيل بالنسبة لهم.

عبد الناصر: نفكر شوية لغاية بكره يا أخ معمر، ممكن.. الساعة ١,١٠.

القذافي: أنا عندي ١٢,١٠.

عبد الناصر: الموضوع أصلا طويل جدا، ولكن الحقيقة أنا بدى أقول لك حاجة ياأخ معمر: الحل العسكرى رهيب جدا وإحنا قد..

القذافي: لكن ما هو مستحيل.

عبد الناصر: لأ.. مافيش حاجة مستحيلة، لكن أولا عدونا شرس ووراه أمريكا هذا موضوع؛ اذاً طالما وراه أمريكا الحقيقة لازم نعتمد على حد يدينا؛ يعنى دلوقتى هو بيضربنا بالطيران بس.. هو حربه طيران بس، لكن فيه يوم رمى على ٢٠٠٠ قنبلة ٢٠٠٠ طن قنابل على حتة حوالين بورسعيد مدد كبير ومدافع وخساير كتير محتملين، مش معنى إن أنا بقول خساير إن احنا فلسنا.. أبدا إحنا نحتمل قد ده مليون مره والله. ولكن اللى باين برضه إن احنا بنحارب وحدنا، يعنى كلهم بيحاربوا بالكلام وإحنا اللى بنحارب بالدم، لكن قصاد ده أنا برضه لازم أروح موسكو وأقعد أرجو وأطلب.. ما تتصور ده برضه على نفس الواحد ايه!

القذافي: طيب هذا ما يستمر هذا الوضع ما هو في صالحنا، كل ما طال الزمن كل ما تعقد الموقف.

عبد الناصر: كل ما طال الزمن كل ما تعقد الموقف، وإذا دخلنا قبل ما نستعد وخسرنا معركة يبقى خسرنا الى الأبد يبقى ضيعنا كل شئ في ثواني!

القذافي: هذا لو تحصل خسارة، لكن إحنا ما يجب نخاف كتير بالدرجة.

عبد الناصر: لأ. لازم نحسب مابقولش نخاف.

القذافي: اسرائيل كسبت بواسطة مجازفة.

عبد الناصر: لم تجازف لا.. لا.. اسرائيل حاسبة وأمريكا حاسبة، اسرائيل لم تهجم إلا لما جونسون جاب رئيس الأركان الأمريكي ورئيس المخابرات الأمريكي وسألهم عن الموقف وكذا وكذا، وقالوا: إن السرائيل تكسب. يعني عندي كتاب فيه تفاصيل العمل السياسي اللي حصل بتاع Bar السرائيل تكسب، ومكتوب بالعربي ومطبوع بالعربي، وطبعا فيه الدعاية الاسرائيلية الواحد بيشيلها وهو بيقرأ الكتاب، ممكن أبعتلك الكتاب ده بكره. لأ.. هم كانوا متأكدين ووايزمان لما تأخر رئيس الوزارة في اعطاء القرار بالحرب – اللي هو دلوقتي وزير المواصلات – قلع الرتب ورماها على الترابيزة وقال: إن هتودوا اسرائيل في داهية! الجيش كان بيطالب بالهجوم.

القذافي: والله اسرائيل ما تقدر تقاتل في جبهات عديدة، على الأقل سوريا.

عبد الناصر: لا.. سوريا والله أنا برضه الأتاسى كويس بس مش كل سوريا الأتاسى، الحزب جوه كتل وفيه حاجات فظيعة جدا.. يعنى فيه ماخوس وفيه زعين وفي صلاح جديد.

القذافى: بعد مدة أخرى تصبح اسرائيل قوة موجودة مفروضة فى المكان، يصبح هذا الموقف أسوأ من الحالى.

عبد الناصر: طيب هل هنقدر نهجم على اسرائيل؟

القذافي: ممكن، وهذا يبني على تقدير موقف.

عبد الناصر: والله ياأخ معمر العراق لم تكن صافية النية، الكلام اللي حصل قبل طرابلس واللي حصل في طرابلس - برضه اسمح لي أكلمك بصراحة في هذا الموضوع - لم يكن الغرض منه فلسطين ولا تحرير فلسطين ولكن الغرض الوقيعة بينا وبينكم وكادوا ينجحوا في هذا!

القذافي: هذا عارفه.

عبد الناصر: لكن بالنسبة لى أنا زعلت جدا يوميها كادوا ينجحوا طبعا، وبعدين أنا مثلا بقول: إن أنا أرفض هذا المشروع، يرد البكر يقول لى: هذا مشروع ليبي! طيب أنا برفض المشروع الليبي، قلت لهم: إنتم فاكرين أنا باخد منهم فلوس أنا مابخدش من ليبيا فلوس! الغرض الوقيعة بينى وبين ليبيا من الكلام اللي في المؤتمر بهذا الشكل، باين هدفه بهذا الشكل وكلهم النهارده بيشتغلوا على الوقيعة بينا وبينكم.

القذافى: هم مايقدروش، حتى فى الأيام اللى فى الثورة أول ما نزل عماش وطلعت له المطار، بكلم أحمد قلت له: روح قابلهم، وشو جانا صدام واجتمع فينا بالليل وقال: نجيب الدبابات ونجهز سرب الطيران ومش عارف ايش نحركوهم ونجيبوه لكم، قلنا: شكرا والله يبارك فيكم كتر خيركم، وخليكم على استعداد لما إحنا نعطيكم الاذن.. لأن احنا عارفين الغرض من هذا الحديث لأن ممكن هذا الجو يساعدهم علشان يقدروا يلعبوا بينا، لأ.. إحنا صاحبين.

عبد الناصر: هو هذا هدفهم.

القذافي: وصدام راح زعلان ومشي من ليبيا زعلان، قال: معمر مارضيش يكلمني.

عبد الناصر: ولن يكون هدفهم، يعنى عبد الكريم قاسم رسم خريطة فلسطين وكتب عليها العودة! عارف طبعا.

نكمل الصبح، تستريحوا يعنى تتاموا بدرى لما تصحوا الصبح يعنى أنا موجود... بتصحى الساعة كام؟

القذافي: والله بدى نصحوا بكرى معلش إن احنا مانقلقلش راحتك.

عبد الناصر: يعنى أي وقت؟

القذافي: نصحى الساعة ٨ انشاءالله، لأن بكره ضروري انشاءالله نرجع ليبيا.

عبد الناصر: طیب بعد ما تصحی بتدیهم خبر یقولوا لی بعد نص ساعة آجی لك علی طول، علشان أنا عارف إنك مش هتصحی الساعة ۱۸ (ضحك)

القذافي: (ضحك)

أصوات: (ضحك)